

etiam facilius eas fieri, ubi sunt montes, ex quibus magnos terrarum tractus prospicere licet, quàm ubi sunt tantum campestres agri. Verum de ea re cum quoquam contendere nolumus, & hinc nobis sermo fuit de recentioribus præsertim Geographis, quos sat magno numero recensuimus.

Possimus hisce addere viros eruditos, qui etiamnum vivunt, Geographiæque Sacræ dilucidandæ operam dederunt, & nunc quoque dant. Sed neque indigent nostris laudibus atque adhortationibus, si erga Rempubicam Litterariam bene animati sunt; neque nos commitemus ut gratiarum ab iis actiones, aut mutuas laudes emendicasse elogiis nostris, aut acerbiori veritate crabrones irritasse videamur.

Si quem omisi ex fato functis, qui commemoratu dignus esset, id neque invidiâ, neque malignitate ullâ à me factum esse omnes faciliè intelligent; cum tot alios nomine appellarim, quibus potius quàm aliis favisse videri non possum. Qui plures noverint, eos Catalogo nostro, per me licet addant, & dignos meritis laudibus afficiant, quibus & plausus nostros libenter jungemus.

Non opus esse judicavimus utilitatem, præstantiamque Geographiæ Sacræ à nobis deprædicari; nemo enim Sacra Biblia paullo attentius legit, eo-que animo ut omnia quàm optimè intelligeret, qui non fateatur innumera esse loca, quæ sine Geographiæ Sacræ mediocri saltem cognitione intelligi nequeunt; ac proinde summopere utilem esse hanc Sacrorum studiorum partem, nec nisi à negligentioribus Scripturæ Lectoribus repudiandam. Quod unum satis esse videtur, ut Scripturarum omnes studiosi, ad Geographiam Sacram cognoscendam atque excolendam, excitentur. Quam in rem non exiguæ utilitatis erit hocce *Samsonis* opus, ut ex iis quæ à nobis dicta sunt satis liquet.

Quin etiam vir bene merendi de Sacrarum Litterarum Studiosis cupidissimus, ut hocce volumen Novum Testamentum legentibus utilius esset, Breve Epitomen Historiæ Christi & Apostolorum Petri & Pauli subjunxit. Melior esse posset, non nego, si post tot Harmonias Evangelicas, Chronologorumque Sacrorum accuratiores labores, ejusmodi Historia texeretur; sed nec hæc usu suo caret, & quæ bono animo à viro industrio facta sunt, à Lectoribus boni sunt consulenda; quâ etiam æquitate nobiscum agi jure, nisi fallimur, nostro postulare nos quoque posse videmur.

*Scribebamus Amstelodami in Museo nostro,*

*Calendis Junius Anni MDCCIII.*